

REGIONAL NEWS

LC Election

Mizoram hmun hrang hranga Village Council leh Local Council inthlanna naktuka neih turah inbuatsaihna engkim peih fel a ni tawh.

Akashvani palai zawhna chhangin State Election Commissioner Dr. H. Lalthlanglana chuan Mizoram hmun hrang hranga Village Council leh Aizawl leh Lunglei-a Local Council inthlan chu naktuk zing 7 atanga tlai dar 4 ah neih a nih tur thu a sawi a. Vote hi zan dar 7 atanga chhiar tur nin polling station tina RO ten result an puang dawn a ti a, vawiin khan district hrang hranga polling party ten polling station an pan tih a sawi bawk.

Dr. H. Lalthlanglana chuan Local council leh Village council inthlanna lo awm turah mipuiten vote an thlak ngei theih nan ruahmanna hrang hrang siam a nih thu sawiin vote nei zawng zawngte vote thlak ngei turin a sawm a. Democracy chu mi zawng zawng mi lian leh mi te inang tlanga sorkar an siam theihna awm chhun ani tih sawiin vote thlak vek turin mipuite a sawm a ni. Naktuk, February ni 12, 2025 a Village Council Inthlan neih tura inpuahchahna kal zelah vawiin khan Champhai District chhunga Inthlan buaipui tur Polling Party te chuan Bawrsap pisa tual atangin an duty-na hmun tur an pan.

District dangah pawh District thuneitute ruahmanna in Polling party kal chhuak turte hian DC office-a Dispatch Counter atangin inthlan buatsaihna tur hmanrua leh bungruate lam khawmin, an bungruate an endik fel vek hnuah an duty-na tur hmun panin an chhuak a. Polling Party-ah hian inthlan huaihawttu tur Returning Officer (RO)-te, inthlan buaipuitu tur Presiding Officer (PRO) leh Polling Officer (PO)-te, venhimna hna thawk tur security-te leh lirthei khalhtute an tel a ni.

Hetih lai hian Lunglei District-a Lalnutui ah candidate a DOral avangin ni 13 hian inthlanna neih a ni dawn a. Lawipu Veng-ah nizan khan Local Council candidate congress party a al avangin vawiin khan Lawipui veng inthlan hun hi sawn niin, m 14 (zirtawpni) ah hemi bial ah hian inthlanna neih a ni ang.

<><><>

ASSEMBLY

Tun thla ni 19 atanga tan tur Assembly inkhawm (budget session) atan starred question 557 lehziaka chhan chi (unstarred question) 54 a lut tawh.

Assembly secretariat atanga thu dawn danin zawhna hi sorkar atangin dan siam tura duan pahnih a lut tawh a, House chhunga chhan chi (starred question) 557 a lut tawhin, ziaka chhan chi (unstarred question) 54 leh Resolution 46 a lut tawh a ni.

March ni 20 thleng assembly thutkhawm awm turah hian ni 14 chhung an thukhawm dawn a, February thla ah vawi 2 thu in March thla ah vawi 12 an thu dawn a, Assembly inkhawm tan ni, February ni 19 hian larsap General Vijay Kumar Singh chuan kum khata assembly inkhawm hmasa ber a nih avangin dan pangngai angin Assembly chhungah thu a sawi ang. Tun tum assembly inkhawmah hian March ni 4 ah finance changtu chief minister Pu Lalduhoma chuan tangka kum thar (2025-2026) atana Mizoram sum hman tur ruahman (annual budget) chu a pharh dawn a ni.

<><><>

MTKP

Tun thla February ni 13 atanga ni 16 inkara Lunglawn mual, Lunglei-a neih tur Mizoram Thalai Kristian Pawl (MTKP) inkhawmpui vawi 48-na atana inbuatsaihna chuan a vawrtawp a thleng chho mek a, palai 5600 chuang kal tur in report an awm tawh.

Mizoram Thalai Kristian Pawl Secretary Rev F. Zorinkhuma'n Akashvani News a hrilh danin MTKP inkhawmpui vawi 48-na ah hian Lunglei khaw pawn atanga riak lut tura in report 5634 an awm tawh a, heng bakah hian Khualtha Mizoram pawn atangin lokal tura in report 30 chuang an awm tawh tih sawiin Mizoram chhunga Kohhran dang Presbyterian atangin Central KTP, Lairam Isua Krista Baptist Kohhran, Evangelical Church of Maraland, Bru Baptist thalai, Chakma Baptist leh IKK Thalai pawhin palai an tir dawn a ti a, heng bakah hian Mission Field zaipawl an tel dawn tih a sawi bawk.

Inkhawmpui pandal "Krista Pasalthate Rûn" ah hian mi Sangriat atanga mi sangkua (8000-9000) vel leng tura beisei a ni a, Tunah hian Pandal hi peih fel thawkhat tawh a ni a, Pandal extension hi Ceilling hmanga siam niin pandal ah hian carpet phah a ni bawk a ni.

MTKP Inkhawmpui vawi 48-na ah hian "Pathian hnaih rawh u" tih chu thupui atan thlan a ni a, February ni 13 (Ningani) zan atangin inkhawm hi a awm tan anga, a tuk zirtawpni ah Rorel inkhawm neih tur niin Inrinni leh Pathianni ah inkhawm a awm anga, Inkhawmpui hi Pathianni zana a tiak dawn a ni.

Mizoram Thalai Kristian Pawl (MTKP) ah hian tun dinhmunah member 50364 awmin hmeichia 19802 leh mipa 30562 an awm a, Unit 447 awmin Bial 92 an awm mek a ni.

<><><>

CYLA

Diltlang to Chawngte 'P' inkar kawng PMGSY hmanga thawh mek chu nimin khan Central Young Lai Association hruaitute leh YLA Sub-Hqrs. Chawngte hruaituten an tlawh.

YLA hruaitute chuan kawngpui tha tak an neih theih nan leh chak taka hna thawk turin hnathawktute chu an ngen a, hnathawhna tikhaihlak leh hmasawna dal zawnga harsatna te a awm chuan sutkian pui turin an inpeih reng thu an sawi a, kawng tha an duh avangin hnathawk tute chu an vil zui reng dawn tih an sawi bawk.

Diltlang to Chawngte 'P' kawng hi PMGSY Package 1 niin, Contractor Pu Lalparmawia, Hlimen (Benjamin Construction) leh Laldawngliana, Keifang ten Joint Venture in an thawk a, Hna tan hun hi Nikum october ni 16 niin, kum 2026-a zawh fel tura ruahman a ni.

<><><>